

19. oktober 2004

UKA 2004/36

**KNI A/S pillugu Inatsisartut peqqussutaata allanngortinneqarneranik
Inatsisartut peqqussutaannut nr. xx, xx 2004-meersumut siunnersuut**
(Ingerlatseqatigiiffissuup KNI-p ingerlataasa ilaneqarnissaat)
(Naalakkersuisut siulittaasuut)

Saqqummiussissut.

Siullermeerneqarnera.

KNI A/S pillugu Inatsisartut peqqussutaata allanngortinneqarneranik Inatsisartut peqqussutaannut nr. xx, xx 2004-meersumut siunnersuut matumuuna naalakkersuisut sinnerlugit saqqummiutissavara.

Naalakkersuisooqatigiit angallannikkut pissutsit pitsaanagerusumik ataqatigiissaarneqarnissaannik sulissutiginninniarnarat naalakkersuisooqatigiinnissamik isumaqatigiissummi atuuttumi ilaavoq. Aammattaaq selskabit Namminersornerullutik Oqartussanit pigineqartut Naalakkersuisooqatigiinnit misissuiffigeqqissaarniarneqarput, pitsangorsaataasussanut tunngaviliisussatut siunnersuutit nassaariniarneqarlutik aammalu selskabit ineriartornissamut periarfissaasa inuiaqatigiinnit tamakkiisumik iluaqutigineqarnissaat siunertaralugu allaffissorneq ataatsimoorussa q pisariitsorlu pilersinniarnearluni. Taakkununga ilutigitillugu aamma inuuniarnermi tunngaviusumik atugassarisaasut pitsangorsaaviginiarlugit nunaqarfanni isorliunerusunilu ineriartornerup annertusarneqarnissaanut suliniutit Naalakkersuisooqatigiit siursaaviginiarpaat.

Naalakkersuisut 11. juni 2004-mi tunngaviusumik aalajangerput makku sulissutiginiarlugit:

- Royal Arctic Bygdeservice A/S-ip (RAB-ip) nioqqutissanik nunaqarfinnut pilersuina KNI A/S-ip tigussagaa, imaluunniit RAB selskabitut KNI A/S-ip pigisaatut ingerlallissasoq.
- Arctic Umiaq Line A/S-ip nunaqarfinnut angallassinera (ilaasunik angallassinera) unitsinneqassasoq, tamannalu KNI A/S-imit tiguneqassasoq.
- KNI A/S-ip Nuka A/S tigussagaa.

Tassuunakkut qulakkeerniarneqarput:

- Nunaqarfinnik sullissinerup inuiaqatigiinnut aningaasartuutaanerata sutigut tamatigut akikinnerulernissaa, 2004-mut aningaasanut inatsimmi (ukiut missingersuusiorfiusut ilanngullugit) minnerpaamik missingersuutitigut annikilliliissutaasussatut annertussuseqartunik.
- Sullissinermi suliassat assigiinngitsut pitsaanerusumik ataqatigiissaarneqarnissaat.
- Nunaqarfinnik sullissineq qaffasinnerusiq kiisalu nunaqarfiit pisariaqartitaasa kissaataasalu aammalu sullissinerup neqeroorutigineqartup naapertuunnerusumik ataqatigiissaarneqarnissaat.

Naalackersuisut tunngaviusumik aalajangernerannut ilaatigut tunngaviuvoq siunnersuisarfiup Arctic Innovators Aps-ip nalunaarusiaa. Siunnersuisarfik naliliivoq nunaqarfinnik sullissinerumik ataatsimoortitsineq inuiaqatigiit aningaasatigut sipaaruteqarfigisinnaagaat, sullissineq ajornerulingikkaluartoq atuisulluunniit akiliuteqartarnerat annertusinngikkaluartoq.

Naalackersuisulli naliliippat nalunaarusiaq ataatsimoortitsinerup aningaasatigut sunniutissaanik erseqqissunik takussutissiinngitsoq. Taamaammatt Naalackersuisut ilassutissatut nalunaarusiamik Maersk Brokerimut piniarsimapput. Nalunaarusiaq taanna 17. september 2004-mi piareerneqarpoq.

Maersk Broker pingaarnertut naliliinermini allappoq:

" Suliakkiummik aqutsisut paasiniaaqqissaarneq kingornalu misissueqqissaarneq pillugit naliliinerat pingaarneq tassaavoq, Naalackersuisut tunngaviusumik aalajangiinerat malillugu nunaqarfinni ingerlatanik KNI-p akissussaaffigisasaanik aqutasaanillu ataatsimoortitsiniarneq nunaqarfinni innuttaasut sullinneqarnerannut pitsanngoriaatissanik, aammalu inuiaqatigiit kalaallit ataatsimut isigalugit aningaasarsiornerannut pitsaaqutissanik arlaqartunik nassataqarumaartoq."

Maersk Brokerilli siunnersuutigaa AUL A/S allanngortinneqassanngitsoq, taamaalillunilu KNI A/S-ip ataani ataatsimoortitsinerumut ilaassanngitsoq.

Paasissutissat pigineqartut tunngavigalugit makku sulissutiginnissaat Naalackersuisut aalajangerpaat:

- Nuka A/S ulloq 1. januar 2005 KNI A/S-imut tunineqassasoq.
- RAB A/S ulloq 1. januar 2006 KNI A/S-imut tamakkiisumik tunineqassasoq, taamaattorli ukiumi 2005-imi ikaarsaariarnissamut piffissaqartitsisoqarluni.

Naalackersuisut oqaasertaliussaq, Namminersornerullutik Oqartussat NUKA-mi aktiaataasa ullormi 1/1-2005-imi KNI A/S-imi aktianik pisissutigineqarnissaannik Naalackersuisunik piginnaatitsisoq, 2005-imut aningaasanut inatsisissatut siunnersuummut allannguutissatut siunnersuutitut saqqummiutissavaat.

Aammattaaq Naalakkersuisut oqaasertaliussamik, Royal Arctic Line A/S-ip Royal Arctic Bygdeservice-imi aktiaatiminik 1. januar 2006 aallarnerfigalugu agguaassinissaanik taakkualu tassunga ilutigitillugu KNI A/S-imi aktianik pisissutigineqarnissaannik Naalakkersuisut selskabip ileqquumumik ataatsimeersuarnerani qinnuiginninnissaannik piginnaatitsisumik saqqummiussissapput.

Kiisalu KNI A/S pillugu Inatsisartut peqqussutaata allanngortinneqarneranik Inatsisartut peqqussutissaattut siunnersuut manna saqqummiunneqarpoq. Siunnersuutip siunertaraa KNI A/S-ip umiarsuaatileqatigiiffimmik ingerlatsinissamut, matumani aamma ilaasunik angallassinissamut kiisalu tunitsiviunissamut nioqutissiornissamullu periarfissinneqarnissaa.

Ingerlatseqatigiiffissuup KNI-p ingerlatsinera pillugu aalajangersakkani maanna atuuttuni allassimavoq, ingerlatseqatigiiffissuup selskabiutai niuerneramik tunngaveqarlutik quersuarniit niuertarfinniillu niuerneramik taassumalu assigisaanik ingerlataqarnermik ingerlatsissasut.

Ingerlatseqatigiiffissuup ingerlatsineranut periarfissat taakku siunnersuutikkut annertusineqarnerisa kingunerisaanik ingerlatai siunissami makkuulissapput:

- Quersuarniit niuertarfinniillu niuernerq.
- Aalisakkanit qalerualinnillu tunisassiassanit, neqaarniat tunisassiaataannit inuussutissanillu allanit nioqutissiorneq aammalu pineqartunut tunngatillugu aningaasalersuisalernissaq ilanngullugu.
- Usinik ilaasunillu nunaqarfinnut nunaqarfinniillu imaatigut assartuineq.

Inatsisartut peqqussutaat maanna atuuttoq naapertorlugu Naalakkersuisut ingerlatseqatigiiffissuup ingerlatseqatigiiffii pisussaaffilersinnaavaat nioqutissanik ulluinnarsiutinik, inuussutissarsiornermut atortunik, ikummatissanik imerpalasunik il.il. pilersuinermi pisortat sullissinerat pillugu niuerneramik tunngaveqartumik atugassaqarfiusunik isumaqatigiissuteqartarnissaannut.

Ingerlatseqatigiiffissuup ingerlatseqatigiiffiisa niuerneramik tunngaveqartumik atugassaqarfiusunik isumaqatigiissuteqartarnissaannut Naalakkersuisut pisussaaffiliisinaanerat siunnersuutikkut annertusillugu aammattaaq usinik ilaasunillu imaatigut assartuineramik kiisalu suliffissaqartitsiniarneq annertusarniarlugu suliniutinik, matumani aamma tunitsivinnik tunisassiorfinnillu pilersitsinissamik attassiinnarnissamilluunniit siunertaqartunik ilaneqarpoq.

Tassuunakkut Namminersornerullutik Oqartussat inuiaqatigiit soqutigisaasa isumannaarneqarnissaannik qulakkeerinnissaat periarfissinniarneqarpoq.

KNI pillugu peqqussummik allannguinnissaq nunaqarfinni ingerlatanik ataatsimoortitsinissap ingerlanneqarsinnaanissaanut aalajangiisuussaaq. Kisianni KNI pillugu peqqussummik allannguinermi erseqqissumik isummerfigineqanngilaq nunaqarfinni ingerlatanik ataatsimoortitsinissaq qanoq ingerlanneqassanersoq.

Taamatut oqaaseqarlunga peqqussutissatut siunnersuut Inatsisartunut ajunngitsumik isummerfigisassanngorlugu suliassanngortippara.